

Dr FERNAND CLÉMENT

LI COUCARDO

Recuel de Pouèsio Prouvençalo

*Çai-dintre un umble rasetaire
Pourgis à sis afeciounaire
Li coucardo qu'èu derrabè
Is Areno dóu Gai-Sabé.*

POURTISSOUN

Moun car Ami,

S'èro necite, poudriéu faire uno longo prefàci pèr voste poulit libre, en estudiant l'art dóu raset. Mai pènse qu'acò sarié nega bèn mal à prepaus lou pèis dins la sauço. Me countentarei dounc de dire que, pèr leva de coucardo, au figura coume au propre, fau autant de courage, se noun mai, que d'adrèisso. Ai couneigu de rasetaire en chambre qu'à l'entour d'uno cadiero fasien de passo remarcablo, mai qu'aurien pas ausa afrounta uno cabreto. Vous, sias davala dins l'areno, e n'en sias jamai sourti li man vuejo. Avès derraba de coucardo... i jurado de Jo Flourau li mai ferouno (vole res óufensa, amor que n'ère proun souvènt), e, vuei, aquéli riban de touto coulour, li trenas e lis óufrissès à vosto gènto Dono em' uno couquetarié que vous vai bèn. Un rasetaire que sarié pas un pau farot, sarié pas un bon rasetaire.

Mi coumplimen, e longo-mai!

Marius Jouveau
Ais lou 26 de novèmbre 1924.